



下營，會贏

見若有人聽著我的故鄉佇臺南，真自然就會繼落去問講：「啊咱臺南佗？」我攏會真得意共應講：「下營！」佢攏會作孽講：「恁遐的人，攏真勢跋歹筊乎？無，哪攏會贏？」其實，阮下營人真樸實，真罕得聽講有做這號僥倖的失德代，這馬就請逐家同齊來認捌阮這個「會贏」的小庄頭。

下營佇麻豆的東北片，平常時你可能袂去注意著這個小小的農村。毋過，便若到選舉，毋管是想欲選總統抑是想欲選立委的，攏會專工走來阮的「大廟」前，共雙手擲懸、大聲喝「某乜人凍蒜！某乜人一定會贏！」因為阮這個地號名，用臺語講拄好是上好吉兆，閣兼共你頓胸坎、掛保證的「會贏」。莫怪，一寡咧指導臺語文比賽的好朋友，攏滾耍笑講欲搬來阮遮躑。

阮下營這個地名是按怎來的咧？其實佢新營、林鳳營、左營遮的地名全欸，攏是古早鄭成功的軍隊佇遮設營盤開墾的所在，因為佇頂營、中營的西片（下游），就共號做下營，閣佇倒風內海的海邊，古早閣叫做「海墘營」。根據記載，下營的「茅港尾」，佇十八世紀彼當時，不管是上北到諸羅縣城，抑是落南到臺南府城，攏愛經過遮。上繁華的時陣有五條大街（茅港尾街、社內街、公館街、二坑街、社尾街），規街市鬧熱滾滾，閣有「小揚州」的嬌名。對這馬的茅港尾街，街頭有觀音寺、中央有媽祖宮、街尾是元帥廟，就會當見證下營過往的風華。毋過，後來因為倒風內海塗沙積窒，港口衰微，煞杳杳仔變成平凡的農村。

雖然按呢，散庄猶是出勢人。下營人認真拍拚，勢寫大字佢畫圖的人才真濟，尤其是咱臺灣廣告設計的勢人、臺灣『馬賽克』的開拓者——顏水龍先生這款國際級的藝術家。這馬你若去臺北的劍潭公園迤迤，閣會當看著一幅足大的壁畫，是伊佇 1999 年用細塊『thài-luh』，一塊一塊杳杳仔黏出來的「水牛圖」呢！閣加上老縣長陳唐山，佇二十幾年前就開始認真推揀「一鄉一特產」，共產業文化化、文化產業化，tsuán 發展出有名的下營三寶——蠶仔絲被、鵝肉佢烏豆。啊若到咱人的三月初三，你閣會當來遮看下營人咧痞「犁轎」。2013 年開始，有一陣下營出身的藝術家閣發起「海墘營藝文雅集」，舉辦畫展、文學展、攝影展，鼓舞後輩做伙來關心家己成長的土地。

寫到遮，我就袂輸是「回鄉的我」這首歌所唱的：「走遍了天涯海角，猶是故鄉的月較圓；食過山珍海味，猶是阿娘煮的較有滋味。」五十歲以後，行過千山萬水，才漸漸了解，嘛是咱家己的故鄉上蓋嬌！因為鄉土佢親情是咱性命的倚靠，嘛是咱靈魂唯一的出路。親愛的朋友啊，你是毋是佢我有全欸的心情佢理解咧？嘛向望你會當行入故鄉的土地，寫出咱對土地的疼佢向望。

作者：林淑期

☆詞彙學習☆

【跋歹筊】puah-pháinn-kiáu：詐賭。

【僥倖】hiau-hīng：行事不義，有負於人。

【頓胸坎】tng hing-khám：此指拍胸脯保證。

【大廟】tuā-biō：此指下營北極殿玄天上帝廟。

【蠶仔絲被】thâm-á-si-phuē：蠶絲被。

【犁轎】lê-kiō：此指下營上帝廟神轎入廟的儀式。